

Morning Dogri (NSD) National News Bulletin 20-06-2024

आकाशवाणी

- प्रधानमंत्री नरेन्द्र मोदी होर अज्ज जम्मू कश्मीर च 15 सौ करोड़ रपे दिएं केई विकास परियोजनाएं गी शुरू करोआंगनं
- सरकारै मुंजी ते कपाह सनें 14 सौहनी फसलें लेई घट्टोघट्ट समर्थन मुल्ल-एमएसपी च बाद्धा कीता ऐ। वाराणसी ब्हाई अड्डे पर नमें टर्मिनल ते रनवे दे विस्तार गी बी मंजूरी दित्ती गई ऐ।
- सरकारै मतेयानें च विश्वसनीयता जकीनी बनाने लेई यूजीसी-नैट मतेयान 2024 रद्द करी दित्ता ऐ ते कन्नै इस मामले च सीबीआई जांच दे हुक्म बी दित्ते न।
- विदेश मंत्री डॉ. एस.जयशंकर होर इक दिन दे अपने सरकारी दौरे पर अज्ज श्रीलंका दे कोलंबो पुज्जा करदे न।
- मर्दे दे आईसीसी टी-20 विश्व कप दे सुपर-8 मकाबले च अज्ज रातीं बारबाडोस च भारत दा मकाबला अफगानिस्तान कन्नै होग।



PM Modi

प्रधानमंत्री नरेन्द्र मोदी होर अज्जै थमां दऊं दिनें दे दोरे पर जम्मू कश्मीर आ'रदे न। जिस दरान ओह डेढ ज्हार करोड़ रपे दिएं विकास परियोजनाएं दा नीह पत्थर ते उद्घाटन करगंन। प्रधानमंत्री होर श्रीनगर च नोजवानें गी सशक्त करने ते जम्मू कश्मीर च बदलाव आन्नने लेई आयोजित इक कार्यक्रम च शामिल होंगन। मोदी होर 2 ज्हार थमां मते नोजवानें गी जिंदियां हाल च नौकरियां लग्गियां न, उनें गी नियुक्त पत्र तकसीम करगंन। मोदी होर 1 ज्हार 8 सौ करोड़ रपे दी कृषि सुधार लेई मकाबलेबाजी आली परियोजना दी बी शुरूआत करगंनं कल 21 जून गी प्रधानमंत्री 10में अंतर्राष्ट्रीय योग दिवस दे मौके आयोजित समारोहें दी अगुवाई, श्रीनगर थमां करगंन। ओह उत्थें लोआए जाने आले शिविर च हिस्सा लेंगन ते मजूद लोकें गी संबोधत बी करगंन।



Kharif

केन्द्री सरकार नै 14एं फसलें लेई घट्टोघट्ट समर्थन मुल्ल बधाने, महाराष्ट्र दा बधावन बंदरगाह विकसित करने ते गुजरात ते तमिलनाडू च पैहला पवन टर्मिनल बनाने दा फैसला लैता। सरकार नै वाराणसी हवाई अड्डे दे विकास ते राष्ट्रीय फोरेंसिक अवसंस्थना विकास योजना लेई बी फैसले लैने, सूचना प्रसारण मंत्री अश्विनी वैष्णव होरें नमीं दिल्ली च आखेआ जे सरकार नै मंत्रिमंडल बैठक च 5 बड्डे फैसले लैते न। उनें आखेआ जे कैबिनेट नै 14एं फसले पर 2024–25 ब'रे लेई खरीफ फसलें लेई घट्टोघट्ट समर्थन मुल्ल एमएसपी गी मजूरी दित्ती ऐ। उनें आखेआ, मुंजी, कपाह, बाजरा, दलहन ते तिलें लेई घट्टोघट्ट समर्थन मुल्लै च खरा मता बाद्धा करसानें गी लाह पुजाग। उनें एह बी दस्सेआ जे सरकार मुल्ल भरै च 2 लक्ख गोदाम बनाने पर बी कम्म करा'रदी ऐ। श्री वैष्णव होरें दस्सेआ जे केन्द्र सरकार नै महाराष्ट्र दे बंधावन च सब्बने मौसमें लेई मुनासब ग्रीनफील्ड बंदरगाह बनाने दा फैसला लेआ ऐ। उनें दस्सेआ जे इस बंदरगाह गी बनाने च 76 जहार 2 सौ करोड़ रपे थमां मती रकम खर्च कीती जाग ते मुकम्मल होने मगरा एह दुनिया दे सब्बने शा बड्डे 10एं बंदरगाहें चा इक बनी जाग।



UGC-NET

सरकार नै जून 2024 आले यूजीसी-नैट मतेयानें गी रद्द करी दित्ता ऐ। किश चिरें मगरा एह मतेयान परतियै लैता जाग जेहदे बारे जानकारी मगरा दित्ती जाग। भारती साईबर अपराध समन्वय केन्द्र आस्सेआ दित्ती गेदी जानकारी मूजब मतेयानें दी प्रमाणिकता कन्ने समझौता कीता गेदा सेही होना ऐ। जांच लेई मामला केन्द्री अन्वेषण ब्यूरो गी देई दित्ता गेआ ऐ।



Neet-Exam

पटना च नीट मतेयान 2024 च कथित बेजाब्तियेण दे मसले पर केन्द्रीय शिक्षा मंत्रालय नै बिहार पुलस दी आर्थिक अपराध इकाई कशा ब्योरेवार रिपोर्ट मंगी भेजी ऐ।

अपने इस ब्यान पर मंत्रालय नै आखेआ जे ग्रेस नंबर देने आले मामले गी पैहले गै नबेड़ी लैता गेआ ऐ।

<><><><><><>

Nirmala

वित्त ते कंपनी कार्य मंत्री निर्मला सीतारमण होरें आम बजट थमां पैहले कल नमीं दिल्ली च मन्ने परमन्ने दे अर्थशात्रिणं कन्नै बजट दे पैहले कीते जाने आले सलाह सूत्र दे पैहले दौर दी बैठक कीती। एह्दे च खजाना राज्य मंत्री पंकज चौधरी, खजाना सचिव, माल, वित्तीय सेवाएं ते कंपनी कार्य विभागें दे सचिव ते मुख् आर्थिक सलाहकार बी शामिल होए।

<><><><><><>

Jaishankar

विदेश मंत्री डॉ. एस.जयशंकर होर अज्ज श्रीलंका दे सरकारी दौरे पर कोलंबो पुज्जा करदे न, इस दरान ओह् दपक्खी सांझेदारी दे व्यापक मुद्दें पर श्रीलंका दे शीर्ष नेतृत्व कन्नै बैठक करगंन। प्रधानमंत्री नरेन्द्र मोदी हुंदे नेतृत्व च नमीं सरकार दे गठन परेंत एह् विदेश मंत्री हुंदी पैहली यात्रा होग। एह् यात्रा भारत आस्सेआ अपने गवांढिणं गी सब्बने शा मती तरजीह देने दी नीति ते अपने गवांढी दोस्त दे तौर पर श्रीलंका दे प्रति भारत दी वचनबद्धता गी बी दर्शादी ऐ। इस यात्रा कन्नै संचार ते संपर्क सरबंधी परियोजनाएं ते सब्बनें खेत्तरें च आपसी सैहयोग गी बी बल मिलोग।

<><><><><><>

Summers

देसै दे केई हिस्सें सख्त गर्मी दी चपेट च न। सेहत मंत्रालय नै राज्यें गी गर्मी करी होने आलियें बमारियें कन्नै निबड़ने लेई तैआरी ते बेल्लै सिर ईलाज उपलब्ध कराने दी सलाह जारी कीती ऐ। एह्दे शा पैहले सेहत मंत्री जगत प्रकाश नड्डा होरें कल गर्मी दी स्थिति ते केन्द्र सरकार दे अस्पतालें दिएं तैआरियें दी समीक्षा कीती। उनें अस्पतालें च सख्त गर्मी दी चपेट च आए दे मरीजें दे ईलाज लेई विशेष इकाइयां खोलने दा निर्देश दित्त। तोआई दिल्ली च पिछले किश दिनें च 16एं लोकें दी मौत होई गई।

अस्पतालें च लूह कन्नै प्रभावत किन्ने गै मरीज भर्ती न। जबरदस्त गर्मी करी साढे 5 सौ थमां मते हज यात्रुएं दी मौत दे 320 ते जार्डन दे 60एं जायरीन दी मौत दी तस्दीक होई ऐ। 50 डिग्री सैल्सियस थमां मते तापमान दे चलदे एह गिनतरी होर बघने दी शँका ऐ।

<><><><><><>

Tamil Nadu

तमिलनाडू दे कल्लाकुरिची च बिसली शराब पीने करी 26 लोकें दी मौत होइ गई ऐ जदके 70 शा मते लोकें दा इलाज चला करदा ऐ। पीड़ित लोकें गी कल्लाकुरिची, सलेन ते पुदुचेरी दे अस्पतालें च भर्ती कराया गेआ ऐ। कल्लाकुरिची दे जिला अधिकारी हुंदा तबादला करी दित्ता गेआ ऐ ते सरबंधत डीएसपी सनें 10 अधिकारिं गी मुअत्तल बी कीता गेआ ऐ। इस मामले च शराब तस्कर गी गिरफ्तार करी लैता गेआ ऐ ते 200 लीटर बिसली शराब जब्त करियै जांच लेई भेजी दित्ती गई ऐ। तमिलनाडू दे सेहत मंत्री एम.सुब्रमण्यम होरें दस्सेआ जे शराब च मती मिकदार च मेथेनॉल होने करी एह मौतां होइयां न। उनें गलाया जे मामले दी उच्च-स्तरी जांच दे हुक्म देई दित्ते गे न ते सरकार इस अपराध च शामिल लोकें खलाफ सख्त कारवाई करोग।

<><><><><><>

PM Modi PSU

प्रधानमंत्री नरेन्द्र मोदी होरें बैंकिंग खेत्तर च बदलाव आहनने आस्तै सार्वजनिक खेत्तर दे बैंकें दी भूमका दी सराहना कीती ऐ। सोशल मीडिया मंच **My Gov. India** पर अपनी पोस्ट च सार्वजनिक खेत्तर दे बैंकें दे मुनाफ दर्शाए जाने पर उनें एहदी सिफत कीती। भारती स्टेट बैंक दा 2013-14 च 10 जहार जहार 800 करोड़ रपे शा मते दा लाह बधियै 2023-24 च 61 जहार करोड़ रपें शा मते होइ गेआ ऐ।

<><><><><><>

Amit Shah

केन्द्री गृहमंत्री अमित शाह होरें केन्द्री मंत्रिमंडल दी बैठक च लैते गेदे फ़ैसलें दी सराहना कीती ऐ। सोशल मीडिया पर कीती गेदी केई सारी पोस्टें च श्री शाह होरें आखेआ ऐ जे प्रधानमंत्री नरेन्द्र मोदी हुंदी अगुवाई तैहत एनडीए दी सरकार करसानें दे कल्याण ते खुशहाली लेई वचनबद्ध ऐ।



T-20 World Cup

मर्दे दे आईसीसी टी-20 विश्व कप दे सुपर-8 आीयान च अज्ज भारत दा मकाबला अफगानिस्तान कन्नै होग। एह मैच अज्ज रातीं 8 बजे बारबाडोस दे किंग्सटन ओवल मैदान च खेड्डेआ जाग। तोआई एह्दे थमां पैहले जंदी रातीं होए दे सुपर-8 दे अहम मकाबले च दक्खन अफ्रीका नै अमरीका गी 18एं रंजें कन्नै हर्रा दित्ता। अमरीका दी तरफा एन्ड्रेस गॉस नै सब्बने शा मते नाबाद 80 रंज बनाए जिसलै के दक्खन अफ्रीका दी तरफा तेज गेंदबाज काबिसो रबाड़ा नै 3 विकटां हासल कीतियां। दक्खन अफ्रीका नै पैहले बल्लेबाजी करदे होई तैह 20एं ओवरें च 4 विकटां मुहाइयै 194 रंज बनाए हे। तोआई हुनै शा किश चिर पैहले सेंअ लुसिया दे डेरेन सैमी नैशनल क्रिकेट स्टेडियम च होए दे इक होर मकाबले च इंग्लैंड नै वैस्टइंडीज़ गी 8 विकटें कन्नै हराई दित्ता ऐ। वैस्टइंडीज़ नै इंग्लैंड अग्गे 181 रंजें दा लक्ष्य रखेआ हा जिसी इंग्लैंड दी टीम नै 2 विकटां मुहाइयै हाल करी लैता। इंग्लैंड दी तरफा ओह्दे सलामी बल्लेबाज फिल सॉल्लअ नै सब्बने शा मते नाबाद 87 रंज बनाए।



Tennis

टेनिस च कल रातीं भारत दे रोहन बोपन्ना ते हुंदे आस्ट्रेलियाई जोड़ीदार मैथ्यू एबडेन लंदन च खेड्डी जा'रदी क्वीन्स क्लब चैंपियनशिप दे मर्दे दे डबल्स क्वार्टर फाइनल च पुज्जी गे न। सिरे दी भारती-आस्ट्रेलियाई जोड़ी नै एलेक्जेंडर अर्लर ते लुकास मेडलर दी आस्ट्रेलियन जोड़ी गी प्री-क्वार्टर फाइनल च 6-4, 6-4 दे सिद्दे सेटें च हराया।

